

**H. TOLLII ORATIO
DE FINE
STATISTICS,
QUAE VOCATUR,
HODIERNAE**

Herman Tollius



74

24712 d 15

Pro reverendissimo
Stuart
m. h.

H. T O L L I I

O R A T I O

DE

FINE STATISTICS, QUAE VO-
CATUR, HODIERNAE.

H. TOLLII
ORATIO

DE

FINE STATISTICIS, QUAE
VOCATUR, HODIERNAE;

PUBLICAE HABITA

Die x. Junii MDCCCIX.

QUUM

IN ACADEMIA HOLLANDIAE REGIA;

PROFESSORIS STATISTICIS HODIERNAE, ARTIS
DIPLOMATICAE ET HISTORIAE BELGICAE
MUNUS AUSPICARETUR.

LUGDUNI BATAVORUM
APUD HAAK ET SOCIOS,
MDCCCIX.

MAGNIFICE RECTOR.

UNIVERSITATIS REGIAE CURATORES VIRI ILLUS-
TRISSIMI.

CIVITATIS LEIDENSIS CONSUL, ET QUI ADJUNCTI
IPSI ESTIS CONSILIARII: PRAETOR, JUDICES, QUI-
QUE HIS MAGISTRATIBUS AB ACTIS ESTIS, VIRI
AMPLISSIMI.

QUARUMVIS DISCIPLINARUM IN REGIA HAC UNI-
VERSITATE PROFESSORES, VIRI CLARISSIMI.

QUI TRIBUNALI ACADEMICO AB ACTIS ES, VIR
SPECTATISSIME.

ORACULORUM DIVINORUM INTERPRETES VIRI PLU-
RIMUM REVERENDI.

QUA-

QUARUMCUNQUE ARTIUM ET SCIENTIARUM DOCTORES, VIRI CONSULTISSIMI, ERUDITISSIMI.

CIVES, HOSPITES, SUO QUISQUE LOCO, SPECTATISSIMI, AUDITORES HONORATISSIMI, OPTATISSIMI.

TU DENIQUE IN AMPLISSIMAM PATRIAE SPEM LAETISSIME SUCCRESCENS JUVENTUS ACADEMICA; UNIVERSITATIS REGIAE ORNAMENTUM; CLARISSIMI HUIUS ORDINIS CURA, VOLUPTAS, DECUS. —

Quem Harderovici primum, deinde etiam Amstelodami et docentem publice et dicentem cives mei benigne quondam et indulgenter audire solebant; nunc ego, A. A. H. H., ex longo quinque lustrorum intervallo, in publica iecurum, atque adeo in illustrissima hac Cathedra constitutus, gravissimum docendi munus, animo, haud facile dixerim, laeto an tristi, alacri an cunctabundo, penitus certe et varie commoto, atque ita profecto auspicor, ut qui me vestro praecipue favore, vestris studiis et benevolentia, ad pristinam illam dicendi libertatem erigendum, omninoque in toto hoc, qui mihi habendus est, sermone sustinendum esse sentiam.

Ex urbe patria Breda, per belli et instantis fere hostis metum, in Hollandiam, atque adeo in hanc ipsam urbem, cum puer admodum a vidua matre translatus essem; in egregio primum Vestro, Magistratus et Cives Leidenfes, Gymnasio, accurata, quae perantiqua harum Scholarum laus est, disciplina ad Graecae Latinaeque Linguae scientiam sum eruditus; deinde autem adolescentior jam,

in hac eadem Academia animum, sub praestantissimis magistris, ad doctrinae studia, ad Literarum & Juris praesertim peritiam, ad virtutem ac vitae honestatem informare elaboravi.— Ubi igitur, saepe haec lubenterque grata mente repetens, senectuti meae, varia temporum vicissitudine jactatae, portum ac perfugium aptum magis magisque jucundum, quam in ea Urbe, in ea Universitate dari optem, quae pueritiam et adolescentiam, patria fere ejectam, susceperunt olim, instituerunt ac formarunt? Eccui ego Academiae aut Urbi, qui adhuc sperari publice aut privatim possint, maturitatis meae fructus lubentius, quam utrique huic, offerre et praebere velim, quibus totum fere me debeo, et a quibus eandem, quam in juventute bonis artibus ornanda expertus sum, benevolentiam, in recreanda etiam et fovenda senectute, rogare mihi et vero sperare audeo.

Ex longa vero, eaque ad evitandas temporum injurias suscepta peregrinatione, post compositos disensionum ac turbarum civilium fluctus, munifico inprimis ac fere singulari augustissimi ejusdemque magnanimi Regis jussu atque auxilio, in patriam redire; cognatos, affines et familiares,

res, a quibus aegre divulsus vixeram, videre iterum et amplecti; quin in hac ipsa concione, affines primum multo mihi carissimos, deinde veteres juventutis et studiorum comites, tum sodales etiam, collegas, discipulos, omninoque amicos et hospites antiquos, ad hanc solemnitatem, ad hunc quasi meum diem praesentia sua cohonestandum, tanto numero congregatos videre, ut a singulis, quod honoris et gratiae causa vehementer cuperam, nominatim salutandis, tum reliquorum Auditorum reverentia, tum temporis, quod mihi ad dicendum conceditur, brevitate secludar; cum honestis praeterea, ut quae mihi laeta grataque obtingunt, recensere pergam, cum honestis quarumvis partium civibus, publicam, quam celebrabant, salutem, in maxima rerum omnium perturbatione, unice secutis, ad sapientem opinionum ac sensuum moderationem conciliari; actam in tot tantisque rerum conversionibus amicorum cuique vitam, ejusque paucissima prospera, adversa pleraque eventa, saepe una repetere; gratulari, consolari, animum ad constantem doctrinae, virtutis et religionis amorem confirmare; antiquam denique fidem testando praestandoque renovare; — Tanta

perfecto haec sunt et talia, ut ad ipsum humanitatis sensum, qualibet depravati animi corruptela, is demum occalluerit oporteat, qui veri hujus et solidi gaudii dulcedinem vel ipse aspernetur vel in aliis reprehendat.

Quam vellem equidem A. A. ut et pauciora mihi et minora essent, quae cum hanc temperent laetitiam, tum animum etiam perturbant vehementer, affligunt, deprimunt. Affligit certe mentem tum meorum, tum vero publicorum, quibus diutissime conflictati sumus, temporum, mihi praesertim, multis et gravissimis de causis, luctuosa recordatio; affligunt praeceptorum et familiarium carissimorum, quos jam in utroque hoc amplissimo confesfu frustra circumspicimus, tristissima desideria, in quibus cum LUZACIUM etiam et KLUITIUM, insignia nuper praeclari hujus Ordinis ornamenta, fatali unius diei clade nobis ereptos lugemus, eo acerbior hic mihi dolor est, quod novam mihi eamque gravissimam de ipso hoc, quod auspico, munere recte fungendo, injicit sollicitudinem; cum unus utrique successor datus, vehementer vereor ut in provecta hac mea aetate, et in ea, cujus mihi optime conscius sum, eruditionis tenuitate, duplex hoc onus
fo-

solus et iam pridem defuetus, satis pro studio ac voluntate mea, aut ex commodo et dignitate hujus Universitatis, sustinere possim.

Accedit tandem, quae vehementer angit me et sollicitat, iniquae, qua in hunc locum escendi, conditionis cogitatio; cum, et aetate et intermisso diutissime Linguae Latinae usu, ad dicendum parum idoneus, in amplissima tamen hac eruditissimorum Virorum corona, et coram iis eloquentiae sive arbitris sive magistris, verba mihi facienda esse video, quibus non vox tantum et latera adhuc integra, sed praecipua etiam exquisitae facundiae laus artis principatum facile assignant.

Itaque, quod initio precari institui, conturbato licet et parum diserto oratori Vos, A. A. H. H., ea benignitate faveatis, quam et aetati meae deberi et temporibus, vos ipsos, qua estis indulgentia, ex aequo et bono censere, cum spero, tum vero confido.

Atque hac quidem conditione, iacta alea esto, A. A., et, quas serенаe vestrae frontes mihi promittunt, aures facillimas, cum orationis praestantia non possumus, simplici tamen argumenti et disputationis popularitate,

confirmati jam audentesque, ut cumque mereri conenur.

Quamquam igitur *Historia Patriae*, et tum hujus, tum universae Historiae ministra, *Diplomatica* argumentis abundans ad utilitatem et ad voluptatem uberrimis, ipsa tamen me, si non rerum tradendarum, at nominis certe novitate et insolentia, ad se maxime revocavit, principe mihi loco demandata, *Statistice Hodierna*; cujus vim rationemque meditando, et mihi ipse certam hujus disciplinae viam ac modum describere, et, quae ex hac disputatione elucebunt, praeclaras ipsius ad hominum societatem juvandam et amplificandam virtutes, vobis, A. A. H. H., et huic maxime Juventuti Academicæ, vere atque ex animo commendare possim.

Dicam igitur *de fine Statistices, quae vocatur, hodiernae.*

Quod dum aggredior, quo susceptae disputationis argumentum ab initio statim recte constituatur et intelligatur, ad antiquissimorum temporum memoriam paulisper mentem mecum animumque revocate, A. A., quibus, disjuncti olim sparsique habitationibus mortales primum,

na-

natura duce, in civitates, formis institutisque mire diversas, coaluerunt; accidit tunc, quod profecto aliter fieri non potuit, ut pro varia dittonis amplitudine, fertilitate atque opportunitate, pro vario partim civium partim imperantium ingenio, et pro varia praesertim ipsius imperii forma, novae hae civitates, uti, quas recens conspexeris, arbores, sive sua ipsarum vi vitali, sive almae terrae sitisque opportuni virtute, seu plantantium denique cura et consilio, aliae aliis laetius provenirent, florarent, et nonnullae etiam, actis altissime radicibus, et ramis adeo latis quaque versus diffusis, ad praecipuam amoenitatis et ubertatis excellentiam adolescerent. Tum vero Civitates hinc aemulatio atque ambitio, inde invidia et livor invadere, hominum animos varie sollicitare, sagaciores prudentioresque eo adducere, ut jam diligentius inter se, modo clam, modo aperte, observando, sive tardioris sive celerioris successus causas indagare, et alienis exemplis publice privatimque sapere conarentur; quod consilium, ex ipsa natura ductum, cum etiam uberrimae, ejusque mutuae utilitatis fructus omnibus commendasset, intensius in dies a doctis et sapientibus viris id agi coepit

pit atque etiam nunc agitur, ut diversarum, praesertim vero florentissimarum Gentium origines, fata, instituta, mores, vires, quanta fieri potest accurate, et cognoscantur et perscribantur, quo uberrima suppetat materia, in qua versentur et unde proficiant, qui rebus publicis sive instituendis, sive regendis et emendandis praesunt.

Historiam ex levibus his, sed propriis certisque lineamentis, equis non agnoscat, A. A., sive ducem Civilis Prudentiae sive ministram? Haec autem cum tam late patet, quam aetatum et terrarum omnium terminos cogitando complecti possumus, multa profecto in tanta hac amplitudine contineat oportet, quae ab his temporibus, ab hominibus populisque, quibuscum vivimus, et a mutuis eorum rationibus et commodis, tanto opere discrepent, ut periculum sit ne, quae inde duxeris rerum agendarum aut moderandarum praecepta, in praesenti rerum statu, noceant magis quam prosint. Altera accedit consideratio, quod etiam recentissimorum temporum Historia, dum universas nobis exponit, quae in quolibet populo vel proxime acciderint vel cum maxime

ac-

accidant, res memorabiles, tanta illarum varietate et copia abundat, ut, quas Civilis Prudentia sectari potissimum et captare solet, observationes descriptionesque, temere sparsas ubivis et multa aliarum rerum mole obrutas, aegre investigare inde, colligere et in una quasi tabula oculis subjicere possis.

Haec igitur ubi tanto magis sentiri coeperunt incommoda, quanto latius et commercia inter gentes et mutuae utilitatis sive spes sive fructus propagarentur, eo demum eruditorum hominum diligentia conferri coepit, ut rerum, quas suo quisque tempore ad cognoscendas civitates et juvandas maxime pertinere censeret, praecipua momenta, in varias *rerum publicarum*, cum singularum tum universalium, *descriptiones* sive *notitias*, ordine ac ratione cogerent, et ab Historia hanc quasi segregatam scientiam haberent; quam, cum *statuum*, uti vulgo loquuntur, id est, civitatum omnium cognitionem complectitur, novo tandem verbo, *Statisticen* appellarunt. Barbara vox, A. A., et ex latino quidem nomine *status*, sed contra Classicorum Scriptorum usum pro civitate accepto, in graecae formae terminationem corrupta; quae tamen eo,

B

quem

quem explicui, sensu, in eruditorum Scholis invaluit, atque adeo imaginem vobis exhibet disciplinae, cum ad utilitatem uberrimae, tum vero tam late diffusae, quam hominum rerumque humanarum, in quibus cum maxime vivimus, noticia intelligi potest; quo magis certe operae pretium nos facturos esse judicatis, A. A.; si, quem jam fere indicavimus, Statistices hujus hodiernae finem paulo accuratius commentando, et obtinendi ejus difficultates, et vero obtenti fructus, quot qualesque esse soleant, breviter persequamur.

Historiae igitur nostri temporis pars multo insignior et praestantior, *Statistice*, cum eum, de quo jam generatim diximus, *praesentem gentium omnium statum, quantum maxime juvari inde et augeri ipsae possint, observandi, cognoscendi et describendi*, finem, tum vero duas praestitum cum matre quasi Historia communes habet, quibus hunc finem assequatur, virtutes; alteram ut *vera*, alteram ut *utilia* narret; quarum prior ab erroris nos levitate, in summo offendendi periculo, prohibeat, posterior vero impediatur ne in anxiam nimis, et putidam adeo, rerum minutarum ac vanarum conquisitionem delabamur.

Jam, quae quidem et qualia sint veri inveniendi ac
tuen-

tuendi praecepta, quae fidei Historicae praesidia ac leges, in scholis librisque tum Philosophorum, tum Historicorum, assatim explicatum habemus et illustratum; quibus cum et vos praecipue abundatis, A. A. H. H., uberiorem gravissimi hujus loci tractationem ita excludere ex hoc sermone et circumscribere liceat, ut eas tantum difficultates memoremus, quae Statisticis studio propriae in hoc genere et praecipuae esse solent.

Quodsi enim multis de causis eo difficilior ad scribendum, eoque ad credendum incertior merito habetur Historia, quo propius cum aetate et temporibus nostris sit conjuncta; quot quantisque veri indagandi impedimentis eam disciplinam implicari existimabimus, quae praesentem maxime gentium et civitatum conditionem persequitur? Varie regnant hic turbantque diversa in quaslibet partes hominum studia: Suarum fere rerum admirator laudatorque, alienarum reprehensor et contemtor nimius, quotusquisque non insuper etiam, sive odio aut amicitia, sive spe insignioris commodi vel gravioris mali metu, seu praepudicata denique opinione aut partium studio, verum, in patriis rebus et exteris aestimandis judicandis-

que, aut praetervidet invitus, aut sciens volensque praevaricando celat, quin etiam migrat? Deinde vero, si quis etiam animum a pervulgatis his vitiis penitus liberum attulerit; si unius veritatis tenacissimus, nec temere gloriari de suis, neque immerito carpere aliena, omninoque neque se ipsum, neque alios fallere velit; ne hunc quidem harum rerum speculatorem testemque habebimus idoneum, nisi et antea ingenium ab omni, quam dicebam, contagionis labe immune, multa rerum, in quarum inquisitione versari velit, scientia imbuerit et ad eam praeterea veri observandi ac perspiciendi facultatem formaverit, ut et celeriter et recte videat; nulla se neque insidiosa rerum specie neque hominum fallacia in errorem induci, non incognita sibi pro cognitis, falsa pro veris obtrudi patiatur.

Ingens fuit olim, A. A., et permagna est etiam nunc Peregrinantium multitudo, numerosi admodum circumferuntur de multis itineribus commentarii, sed pauci ab illis, quae indicavimus, vitiis liberi, aut his, quas proxime diximus, dotibus instructi; plurimi etiam ex eo genere scriptorum, qui sive levitate et socordia, sive vanitate

aut

aut, quod abjectius, lucri studio, nova potius et mirabilia, quibus leves homines et creduli, vel pueri adeo se delectent, quam certa et vera, quibus graves viri et prudentes ingenium alant, temere undique arripuisse et perscripisse videantur.

Longum profecto et vero odiosum foret, A. A., ipsa vobis, hujusmodi scriptionum exempla citare; plenae his ubique Bibliothecae, plenae sunt Ephemerides literariae: quo magis profecto diligenti rerum humanarum speculatori cavendum esse intelligitis, ut ne temere quemquam ex hac scriptorum gente ducem sequatur, multoque minus ei, ad quem casus ipsum detulerit, tam pervacilliter et quasi mordicus adhaerescat, ut, omissa considerandi singula et ponderandi cura, ficta cum certis, falsa cum veris promiscue ac temere amplectatur.

Verum hic audire mihi videor, qui dicant: ubi privatis tu itinerum commentariis tam timide, tam difficulter fidem habes; ecquid etiam, quae ab indigenis ubique scribuntur, aut quae publica auctoritate prodeunt, relationes, descriptiones, commentarios, summaria, indices, recusandos esse censet et rejiciendos? Ecquid ipsa Acta

et instrumenta imperii, quae in singulis gentibus promulgantur, sugillare, in fraudis vel erroris suspensionem adducere velis?

Haud certe is ego sum, A. A., qui cujusquam fidelitatem aut laudibus detractum, sed, qui meae tamen disciplinae finem recte constitutum servatumque cupiam: In indigenarum autem relationes eadem valere ipsi intelligitis, quae modo de diversis hominum studiis, quibus omnia temere misceantur, generatim observavimus, neque fugere vos facile possit eo majora hinc errandi pericula et fallendi incitamenta existere, quo magis, hac nostra praesertim aetate, ita ubique per omnem terrarum orbem turbatur, ut nulla fere gens, nullus sit populus, qui non magno et horrifico, quod omnes fere nationes attingit, bello conflictetur et intestinis praeterea civium dissensionibus aut aperte agitur aut clam et occulte corrumpatur: unde quae vel a principibus et gravissimis viris, de rebus etiam, quae ipsi administraverint, patriis perscribuntur, nescias saepe utrum a veri amore an a partium studio profecta, utrum simplicia et sincera, an vero sive odio atque in-

vi.

vidia, five gratia et favore, varie sint detorta, adornata, corrupta.

Quandoquidem vero gentibus inter se eadem affectiones, eadem studii et offensionis causae esse solent, quibus singulorum hominum vel copulatio mutua vel disjunctio continetur, sequitur profecto, ut, quae a quolibet populo promulgantur, relationes, commentarii, caeteraque imperii instrumenta, non sine discrimine et delectu pro veris habenda, sed ad sinceri etiam subtilisque judicii stateram examinanda esse censeamus; cum praefertim, quae haud exigui momenti huc accedit consideratio, plurimae saepe in qualibet gente existant causae, quae, five tributorum aut vectigalium fraudandorum, five alterius cujuscunque compendii spe, eo impellant homines, ut tabularum publicarum fidem, professionum fraude et mendacio, infirmant, tollant, evertant: quo efficitur ut de civium et incolarum numero, de agrorum latifundiis, eorumque tum natura, tum cultura, de jumentorum et pecorum reliquorum multitudine, de fabricarum, artificiorum, opificiorum ratione et frequentia, de mercium importatione atque evectione, et de caeteris denique hu-

jus-

jusmodi rerum publicarum aestimandarum momentis, ipsa imperiorum sive summaria sive commentaria non perpetuo certi aliquid habeant et explorati.

Atque haec omnia toleranda et superanda forte essent, nisi continuae accederent, quibus Europa per plurima jam lustra misere affligitur, bellorum et commotarum ubique dissensionum turbae, per quas, communia olim gentibus jura, pacta quondam foedera, et quorumvis imperiorum principia, fines, quin ipsa possessio et quasi proprietas, tam varie in dies migrantur, ut quae heri adhuc verissima et ad perpetuitatem stabilita esse constabat, hodie vix pro certo affirmare ausis.

Quid igitur, A. A. ? cum ipsa illa, in qua versari, qua niti nostram disciplinam oportet, veritas his, quas vidimus, difficultatibus demersa, vix, qua certo prehendi ac teneri possit, ansam dare videatur; itane eadem animis, ut jam de fine scientiae nostrae obtinendo plane desperemus, ut his praesertim Europae temporibus nullam cogitari, nedum doceri posse Statisticen statuamus? Immo vero eo diligentius, A. A., ab hac nobis caveamus, qua vulgo peccatur, in judicando inconsiderantia, quo
ma-

major imperia omnia, eorumque conversiones curatius per-
 noscendi, ex ipsis, quae recensui, impedimentis conse-
 quitur necessitas. Qui enim in confirmato satis certoque
 olim rerum statu, publica privatimque nostra permagni
 interesse censebamus, quae vis et ratio cujusque civitatis,
 quale civium ingenium, quae et quanta mercaturae copia,
 quae foedera, quae offensiones essent, accurate tenere et
 nostrae inde sive utilitati prospicere sive securitati; nunc
 tandem, in rebus undique turbulentis, in tristissimis po-
 pulorum de ipso imperio terrarum, bellis; in mira homi-
 num, de veris civitatum formandarum et regundarum prin-
 cipiis, disidentium, contentione; in continuo denique et
 ancipiti propriae mercaturae, coloniarum, et aliorum com-
 modorum discrimine, desides nos et otiosi in secura no-
 bis placebimus ignorantia? Quid agant gentes aliae, quid
 machinentur, qui statum rerum praesentem mutare, quem
 collocare velint, non curabimus? Commoda, quae prae-
 pare, pericula, quae avertere conveniat, aequaliter negli-
 gemus? Avitae majorum nostrorum navitatis et pruden-
 tia obliti, quas ab iis accepimus, amplissimas res et flo-
 rentissimas, nostra denique inertia penitus perdemus?

C

Quin

Quin potius eo intentius omnia inquirere conemur, quo majora inde vel sperare vel timere convenit: In ipsis veri indagandi difficultatibus non desidia pabulum, sed stimulum habeamus sedulitatis, quae cum investiget perpetuo omnia et scruterur, tum vero iusta certaue rationis libra, ita ponderet atque examinet, ut, cum in alteram lancem odii, gratiae, ostentationis ac vanitatis, quae suis notis signisque cognoverit, commenta, in alteram autem, quae vera videantur aut maxime probabilis, imposuerit, inclinet facillime posterior haec, et priorem illam gravissimo veritatis ipsius momento altissime elevet. Quam si huic scientiae praestemus diligentiam, praesens gentium ac populorum status vel satis ex vero cognosci, vel certe, quando solidam ejus atque expressam imaginem tenere non licet, ea tamen species et forma haberi poterit, quae ad percipiendos, quos maxime spectamus, fructus abunde nobis sufficiant.

Atque ita quidem ultro ac fere inscii ad eam disciplinae nostrae virtutem pervenimus, cui supra secundus locus assignatus est, ut nempe *utilia* narret; in quo argumento ne latius hic sermo evagetur, primum quidem a

re-

rebus minutis et exilibus perscrutandis eo minus dehortabimur, quo graviora et majora habet Statistice, quae generosos certe animos a nugis et quisquiliis avocent: Delectationis porro et jucunditatis, quibus animos ad se allicere et permulcere solet, fructus, silentio praetermitteremus, et, quod homini denique innatum, in ipsis infantibus mire elucet, res novas et admirabiles audiendi ac videndi studium, ne memorabimus quidem quanta cum voluptate in hac scientia versari possit, nec quam infinitis peregrinationum sumtibus, quam variis quarumvis corruptionum periculis parceretur, si curiosi homines: vel domi discerent, quae peregre communiter observari novimus, vel, ubi peregrinandum esse censent, animum certe tum aliarum doctrinarum, tum hujus imprimis disciplinae praesidiis, ad exteras nationes visendas cognoscendasque, informarent antea et praepararent: Deinde vero etiam, quae ampliora et insigniora, i spectari hic et obtineri solent, commoda, cum ornari multis verbis et commendari posset, in breve tamen omnia veluti orationis commentarium compellere conabimur.

Summus igitur mundi opifex, Deus, sapientissime omnia

nia ac providentissime ita juncta inter se et copulata esse voluit, ut, quemadmodum ex diversis fidium sonis concertus atque harmonia, ita ex multa dissimilium rerum varietate, unus ac perpetuus existat consensus.

Quae certe in gentibus terrisque differentia observatur fere incredibilis, ut quibus, sive animi et ingenii, sive corporis, seu denique ipsius soli dotibus excellent aliae atque abundant, eadem contra apud alias aut desiderantur omnino, aut diversi generis donis ab ipsa natura compensentur, quo tandem alio spectare, quo ducere et quasi cogere homines, nisi eo debuit, A. A., ut mutua sibi gentes auxilia praestiterint; bona invicem, abundantes cum indigentibus, communicarint, et quantumlibet locis, ingenio, lingua, ipsoque colore disjunctae in unam tamē generis humani societatem conciliari coeperint: Unde, qui quidem adiri possunt populi, nulla inventa, nullos sive ingenii, sive industriae, seu terrae denique fructus, ita sibi privatos habent et proprios, ut non caeteris gentibus quasi communes sint; ut non, quod usquam terrarum sit, ubique haberi possit.

Et privatae quidem industriae haud scio an neque latior
ne-

neque amoënior facile, quam hic ipse aperiatur campus, in quo libere excurrat, miras diversarum gentium varietates cognoscat, fructusque sibi colligat uberrimos. Sive enim doctrinam quis et eruditionem, sive artes, agriculturam, fabricas, opificia, sive mercaturam denique et commercia, novis incrementis augere, aut novas illis ad majorem splendorem et amplitudinem vias munire velit, unde quaeso praestantiora, vel praecepta consilii exequendi, vel exempla, quam ex populorum diversorum notitia petat? Majores profecto nostri, A. A., cum omne hoc, tenue initio apud nos et exile, studiorum atque institutorum privatorum genus ad incomparabilem postea industriae, fidei et opulentiae laudem nobilitarunt, dubium mihi videtur utrum suae minus solertiae, qua tamen excellebant maxima, quam aliorum debuerint exemplis, quae illos satis constat, diligenter observandò et prudenter imitando, ad res suas amplificandas contrulisse.

Atque haec eo. illustriora majorum merita, eo insigniora sunt emolumentorum, quae ex terrarum gentiumque notitia sperari possunt, documenta, quo difficilior ista aetate ad illarum cognitionem aditus, quo rariores

scholae erant et libri minus apti, in quibus ad eam recte atque ordine erudiri et informari juvenus posset; unde, cum nos quidem, neque librorum de hac scientia neque Scholarum penuria laboramus, mox etiam, quod valde speramus, praeclaris tuis, optimeet dulcissime Frater, BENNETE, *Oeconomiae*, quam dicunt, praeceptis abundabimus, optandum omnino est, ut cives nostri cum his suis propriisque bonis strenue utantur, tum vero, quemadmodum rerum indagandarum praesidiis, ita et inceptorum amplitudine ac successu, ipsam Majorum industriam et fortunam superare possint.

Jam vero, cum de privatis commodis, Vos A. A., habere mihi videor consentientes, publica profecto non dubitabitis, quin recte etiam ad Statisticos finem referantur. Primum enim universae cujuslibet civitatis atque imperii salutem et splendorem novimus omnes plurima singulorum civium prosperitate contineri, ut nihil, quod rectum justumque sit, privatis fortunis prodesse possit, quod non publicam quoque prosperitatem augeat. Deinde autem ad privatam illam, qua late patere videmus, civium industriam stimulandam ac regundam; ad
bo-

bonas leges ferendas et tuendas; ad religionem morsque
 fartos tectos servandos; ad tributa et vectigalia sapienter
 imponenda et percipienda; ad plurima, maxime aquarum
 terras nostras inundantium, pericula propulsanda; ad ami-
 citias circumspiciendas et foedera ineunda, conservanda;
 ad bellum denique sive avertendum sive sustinendum;
 omninoque ad rempubl. domi forisq. pace ac bello
 feliciter administrandam et ornandam, ecquae foecundior,
 ecquae magis necessaria esse possit, quam accurata rerum
 domesticarum et externarum notitia, quam haec ipsa, de
 qua agimus, *Stasifice*?

Mihi quidem temerariae, qua imperiti homines ad
 rempublicam accedere, et gravissima munera capessere
 solent, ambitionis levitatem saepe cogitanti mecum et
 deploranti, semper fere et fabri istius, ut ita dicam, *Stan-*
narii, quem in scena ridemus omnes ultra vasa sua
 judicantem, et vero jucundissimi illius sermonis in men-
 tem venire solet, quo apud *XENOPONTEN* *SOCRATES*,
 juvenem vel adolescentem adeo Glauconem, cum aeta-
 tis tum ambitionis aestu abreptum, ita a republica capes-
 senda avertit, ut, cum ad agnoscendam, cujus adhuc ni-
 mi.

mium securus fuerat, et suae civitatis et aliarum inscientiam, percunctando illum interrogandoque adegisset, suum tandem ipsi probet consilium, quod et Academicae huic juventuti unice commendari convenit. „ Ut in eos „ nempe intueamur, qui, quae non intelligunt, dicere „ tamen et facere instituant; videamusque, utrum laudentur propterea an vero in reprehensionem incurrant; „ utrum admirentur hos cives sui an vero contemnant; „ ut contra et illos observemus, qui, quae dicunt faciuntque, probe sciant; quo intelligamus in omnibus „ rebus, qui in hominum laude et admiratione sunt, ex „ peritisimis, qui in vituperatione et contemptu, ex imperitisimis esse, ut adeo, si quis et gloria et hominum „ reverentia in sua civitate florere cupiat, ei id „ omnino efficiendum sit, ut quae facere velit, optime „ intelligat, cum, qui hoc praesidio aliis excellerit, „ facile in republica administranda, quae desideret, sit „ assecuturus.”

Neque in his tamen privatis publicisque commodis spectandis subsistat oportet, qui omnem scientiae nostrae amplitudinem, atque adeo extremos etiam terminos,
ul-

ultimum quasi et summum finem, animo et cogitatione amplexus sit: ad altiora hic et sublimiora tendit, quibus homines gentesque juventur et beentur universae.

Dum scilicet, apud quos populos, sive mercibus vendendis aut commutandis, sive coloniis ducendis, seu armis denique inferendis, plurimum nobis lucri sperare liceat, solliciti anquirimus, an quae ad animos mutua institutione erudiendos, quae ad mores spectant emendandos, auro tantum et divitiis intenti, caetera ignavi securique, turpiter negligemus?

Qui veterem illam majorum nostrorum et septentrionalium fere gentium omnium barbariem, cum hoc, quo maxime floremus, cultu comparaverit, nae ille divinam profecto providentiam veneretur oportet, qua moderante, antiqua primum illa cum ipsis Romanis, et alia plurima bella; deinde Caroli Magni ejusque succesorum arma ac disensiones; tum Expeditones, quae vocantur, cruciatae; ductae porro, in Americam maxime, Coloniae; gravissimae praeterea inter haec omnia, et fere continuae per omnem Europam, de sacris rebus et civilibus, contentiones; et multa denique, per ipsas has causas insigni-

D

ter

ter dilatata hominum commercia, hoc tandem, quod neque quaerebant harum rerum auctores neque animo prospiciebant, efficere tamen debuerunt, ut ab inveterata barbarie sensim homines ad praecipuam hanc ingeniorum morumque elegantiam, inscii fere invitique deducerentur. — Ad quam igitur animorum culturam et conjunctionem genus nostrum a sapientissima illa rerum humanarum gubernatrice, providentia, per clades etiam et calamitates ductum et quasi compulsum esse intelligimus, ad eandem et nos, divinae bonitatis aemuli, quibuscunque nobis liceat viis, revocare omnes conemur, quotquot sive homines sive populi, in veteri illa barbarie demersi adhuc et sepulti, a cultioribus gentibus ingeniorum ac morum ferocia separantur. In altissima nos Statistices quasi specula collocati, diligenter quidem unde res nostrae et quibus viis augeri possint, sed simul tamen, et vero magis etiam modos rationesque omnes circumspicimus, quibus non imperium nostrum sed patrocinium proferatur, quibus nostra, culturae praesertim et religionis bona, aliis etiam longissime disjunctis nationibus impertiantur, et quibus adeo, quod Dei certe consiliis est consentaneum

et

et quod libri nostri sacri sperare jubent, universum hominum genus, sensim, ad humanitatis et beatissimae vitae confociationem congregetur.

Quae quo ampliora sunt et graviora, et quo difficilior est veri ipsius, unde manare haec commoda debent, indagatio, eo majores et AUGUSTISSIMO REGI et vobis, CURATT. ILL., gratias habendas esse intelligo, qui praeter Historiam Patriae et Diplomaticam, hanc etiam tanti momenti disciplinam mihi demandare volueritis: ad quas omnes rite tradendas, si forte, quod jam initio vehementer me vereri dicebam, vires non suffecerint, studium certe meum et diligentiam non defutura esse cum sancte atque ex animo polliceor, tum tu inprimis spondenti credes, non ordine magis equestri et muneris honore, quam praesentanti humanitate et insignibus in bonas literas atque in hanc ipsam Universitatem regiam meritis, illustrissime BOSCHI: Cum in illustri Amstelodamensium Athenaeo doctenti mihi et amicus et sodalis esses, et cum praeterea etiam, tum in eximio et singulari, quem nimis mature Literis et huic adeo Universitati ereptum necdum eluximus, NIEULANDO, tum in aliis, quos munifice admodum in

D 2

tuam

tuam quasi clientelam suscipere solebas, melloris spei adolescentibus, omnem disciplinae meae rationem cognovisses; summo me semper, quod gratus agnosco, studio et voluntate es profectus; quod certe neque tunc facturus, neque nunc tanta me iterum gratia ac benevolentia complexurus fuisses, nisi mea haec, quam sequi soleo, officii in studiis juvandis religio satis tibi perspecta fuisset et probata. — Quod tuum iudicium uti mihi est perhonorificum, ita curabo profecto Vir Illustrissime, ne te illius unquam poeniteat. —

Neque vobis adeo, Viri Clarissimi, aliis ego doctibus, nisi summa meritorum vestrorum reverentia, boni publici studio, et aperti ac simplicis animi candore, placere possim. — Vos praesertim, OOSTERDYKI et PARADISI, lectissimum amicorum meorum par, multo mihi usu, multis amicitiae artisque vestrae documentis, tu etiam OOSTERDYKI, jam antea in Harderovicena Academia, gratissimo collegii vinculo, conjunctissimi, vos igitur, quorum in intimam familiaritatem et adhuc admissus fui, et perpetuo admitti spero, et vos praeterea, quorum studiis et voluntate semper florui,

nul, BOERSI, TE WATERE, KESSELE, SANDIFORTE, BRUGMANSI, Vos, inquam, omnes, Viri amicissimi, uti antiquam mihi benevolentiam, quod enixe precor, continuabitis, ita libenter etiam, testimonii et commendationis vestrae auctoritate, apud reliquos hos, Viros Clarissimos, in ea me, quam cupio rogoque, gratia ponetis; quod apud te in primis factum velim, Cl. HAGEMANNE, qui non meritisima tantum eruditionis et vero humanitatis laude celebraris, sed continuato etiam per plurimos annos studio, eam Civilis praesertim Prudentiae, Historiarum et ipsius denique Statistices peritiam et comparasti tibi et publice probasti, ut Scholas equidem meas, huic nostrae Juventuti Academicæ eo utiliores fore confidam, quo benignius et frequentius, tui adeundi et consulendifeceris mihi copiam.

Vobis denique, generosi Juvenes, togatae hujus militiae Commilitones jucundissimi, sive dux studiorum sive socius ero, vestrum amantissimus. Sene quidem me, sed neque moroso admodum, neque exacti temporis laudatore nimio, omninoque tali et amico utemini et praecptore, qui, ex variis magnisque tempestatibus tandem in

D 3

hunc:

hunc quasi portum receptus, nihil habeam, quod optem amplius in hac vita et sequar, nisi ut vestris inservire possim et hujus Universitatis commodis, et cui quod reliquum est, animus, a prima inde juventute doctrinae, literarum et religionis studiis, deinde etiam multo rerum et hominum usu, ad eam rerum humanarum despicientiam informatus sit et corroboratus, ut uni officiorum sancte servandorum curae intentus, cetera securus, ex caduca hac et fragili meliorem vitam, certus hilarisque prospiciam.

D I X I,



